

职方典

職方典第二百五卷

濟南府部藝文一

東封泰山記

後漢書

維建武三十有二年二月皇帝東巡狩至於岱宗柴望秩于山川徧于羣神遂觀東后從臣太尉憲行司徒事特進高密侯禹等漢賓二王之後在位孔子之後褒成侯序在東后藩王十二咸來助祭昔在帝堯聰明密微讓與舜庶後裔握機王莽以舅后之家三司鼎足冢宰之權勢依託周公霍光輔幼歸政之義遂以篡叛僭號自立宗廟隳壞社稷喪亾不得血食十有八年揚徐青三州首亂兵革橫行延及荊州豪傑并兼百里屯聚往往僭號北夷作寇千里無煙無雞鳴犬吠之聲皇天睠顧皇帝以匹庶受命中興年二十八載興兵是以中次誅討十有餘年罪人斯得黎庶得居爾田安爾宅書同文車同軌人同倫舟輿所通人迹所至靡不貢職建明堂立辟雍起靈臺設庠序同律度量衡修五禮五玉三帛二牲一死費吏各修職復於舊典在位三十有二年年六十二乾乾日昃不敢荒寧涉危歷險親巡黎元恭肅神祇惠恤耆老理庶遵古聽允明恕皇帝惟慎河圖雒書正文是月

辛卯柴登封泰山甲午禪於梁陰以承靈瑞以爲兆民永茲一字垂於後昆百僚從臣郡守師尹咸蒙祉祐永永無極

泰山封禪儀記

應劭

車駕正月二十八日發雒陽宮二月九日到魯遣守謁者郭堅伯將徒五百人治泰山道十日魯遣宗室諸劉及孔氏瑕丘丁氏上壽受賜皆詣孔氏宅賜酒肉十一日發十二日宿奉高是日遣虎賁郎將先上山三案行還益治道徒千人十五日始齋國家居太守府舍諸王居府中諸侯在縣庭中齋諸卿校尉將軍大夫黃門郎百官及宋公衛公褒成侯東方諸侯雒中小侯齋城外汶水上太尉太常齋山虞馬第伯自云某等七十人先之山虞觀祭山壇及故明堂宮郎官等郊肆處入其幕府觀治石石二枚狀博平圓九尺此壇上石也其一石武帝時石也時用五車不能上也因置山下爲屋號五車石四維距石長丈二廣二尺厚尺半所四枚檢石長五尺廣六寸狀如封篋長檢十枚一紐號石高丈二尺廣三尺厚尺二寸名曰立石一枚刻文字紀功德是朝上山騎行往往道峻峭不騎步牽馬乍步乍騎且相半至中觀留馬去平地二十里南向極望無不觀仰望天關如從谷底仰

觀抗峯其爲高也如視浮雲其峻也石壁竇窾如無道徑遙望其人端如行朽兀或爲白石或雪久之白者移過樹乃知是人也殊不可上四布僵臥石上有頃復蘇亦賴齋酒脯處處有泉水目輒爲之明復勉強相將行到天關自以已至也問道中人言尙十餘里其道旁山脅大者廣八九尺狹者五六尺仰視巖石松樹鬱鬱蒼蒼若在雲中俛視谿谷碌碌不可見丈石遂至天門之下仰視天門窅遼如從穴中視天直上七里賴其羊腸逶迤名曰環道往往有綆索可得而登也兩從者扶挾前人相牽後人見前人履底前人見後人頂如畫重累人矣所爲磨臂捏石捫天之難也初上此道行十餘步一休稍疲咽唇焦五六步一休蹠蹠據頓地不避濕暗前有燥地目視而兩腳不隨早食上晡後到天門郭使者得銅物銅物形狀如鐘又方柄有孔莫能識也疑封禪具也得之者汝南召陵人姓楊名通東上一里餘得木甲木甲者武帝時神也東北百餘步得封所始皇立石及闕在南方漢武在其北二十餘步得北垂圓臺高九尺方圓三丈所有兩陛人不得從上從東陞上臺上有壇方一丈二尺所上有方石四維有距石四面有闕鄉壇再拜謁人多置錢物壇上亦不掃除國家上見之則詔書所謂酢梨酸棗狼籍散錢處數百幣帛具道是武帝封禪至泰山下未及上百官爲上

跪拜置梨棗錢於道以求福卽此也東山名曰日觀者雞一鳴時見日始欲出長三丈所秦觀者望見長安吳觀者望見會稽周觀者望見齊西北有石室壇以南有玉盤中有玉龜山南脅神泉飲之極清美利人日入下去行數環日暮時頗雨不見其道一人居前則先知蹈有人乃舉足隨之比至天門下夜人定矣

齊州二堂記

宋曾鞏

齊濱灤水而初無使客之館使客至則常發民調材木爲舍以寓去則撤之旣費且陋乃爲徙官之廢屋爲二堂於灤水之上以舍客因考其山川而名之蓋史記五帝紀謂舜耕歷山漁雷澤陶河濱作什器於壽丘就時於負夏鄭康成釋歷山在河東雷澤在濟陰負夏衛地皇甫謐釋壽丘在魯東門之北河濱濟陰定陶西南陶丘亭是也以予考之耕稼陶漁皆舜之初宜同時則其地不宜相遠二家所釋雷澤河濱壽丘負夏皆在魯衛之間地相望則歷山不宜獨在河東也孟子又謂舜東夷之人則陶漁在濟陰作什器在魯東門就時在衛耕歷山在齊皆東方之地合於孟子按圖記皆謂禹貢所稱雷首山在河東媯水出焉而此山有九號歷山其一號也予觀虞書及五帝紀蓋舜娶堯

之二女乃居媯汭則耕歷山蓋不同時而地亦當異世之好事者乃因媯水出於雷首遷就附益謂歷山爲雷首之別號不考其實矣由是言之則圖記皆謂齊之南山爲歷山舜所耕處故其城名歷城爲信然也今灤上之北堂其南則歷山也故名之曰歷山之堂按圖泰山之北與齊之東南諸谷之水西北匯於黑水之灣又西北匯於柏厓之灣而至於渴馬之厓蓋水之來也衆其北折而西也悍疾尤甚及至於厓下則汨然而止而自厓以北至於歷城之西蓋五十里而有泉湧出高或至數尺其旁之人名之曰趵突之泉齊人皆謂嘗有棄糠於黑水之灣者而見之於此蓋泉自渴馬之厓潛流地中而至此復出也趵突之泉冬溫泉傍之蔬甲經冬嘗榮故又謂之溫泉其注而北則謂之灤水達於清河以入於海舟之通於濟者皆於是乎出也齊多甘泉冠於天下其顯名者以十數而色味皆同以予驗之蓋皆灤水之旁出者也灤水嘗見於春秋魯桓公十有八年公及齊侯會於灤杜預釋在歷城西北入濟水自王莽時不能被河南而灤水之所入者清河也預蓋失之今灤上之南堂其西南則灤水之所出也故名之曰灤源之堂夫理使客之館而辨其山川者皆太守之事也故爲之識使此邦之人尙有考也熙寧六年二月己丑記

齊州北水門記

前人

濟南多甘泉名聞者以十數其醴而爲渠布道路民廬官舍無所不至潏潏分流如深山長谷之間其匯而爲渠環城之西北故北城之下疏爲門以洩之若歲水溢城之外流潦集則嘗取荆葦爲蔽納土於門以防外水之入旣弗堅完又勞且費至是始以庫錢買石僦民爲工因其故累石爲兩崖其深八尺廣三十尺中榘析爲二門扁皆用木視水之高下而閉縱之於是外內之水禁障宣通皆得其節又無後虞勞費以熄其用工始於二月庚午成於三月丙戌董役者供備庫副使駐泊都監張如綸右侍禁兵馬監押伸懷德二人者欲後之人知作之是我三人始也來請書石故爲之書時熙寧五年壬子也

齊州景靈巖記

張公亮

泰山西北陞羣山擁翼連屬百餘里摩空干雲秀拔萬狀曲如列屏削如立壁矗如攢劍銳如直圭幃幌掩映城堡環遶虎兕奔突龍蛇盤屈崑崙爲巖谷呀爲洞穴斷爲谿澗引爲林麓峯卓嶺聳巒跳巘疊翠水蔭蔚飛泉激越中有川焉厥土衍沃齊魯通道出於其間左一山特起曰雞鳴緣北麓絕

澗循峪口上東北走二十里險盡地平山勢圍抱四面峭絕如堵牆蒼巖之下紺殿崛起峻塔貫雲
寶樓結瑤高門嵯峨長廊連延遠而望若畫圖中物卽是寺也按圖經本希有佛出現之地後魏正
光年法定師始置寺有青蛇白兔雙鶴二虎之異我朝景德方錫今額先是舊制質略率意締構因
地任材行列不次景祐中主僧瓊環者卽衆堂東架殿兩層龜首四出南嚮安觀音像文楣藻棋頗
極精麗設簾刻鯨以警昏曉後主事者復置殿之兩楹闢土壘石填澗爲回廊庭除顯敞乃爲大壯
寺有石三門千佛殿與釋迦殿辟支佛塔皆古制塔西長松狀若偃蓋背有一峯聳起百丈北望正
方青壁削成如韎韐玉半有石龕金容儼然西尖峰可登下視深谷千仞前有洞東西三門相通中
設羅漢像西南望一山壁穴如車輪午達晴日在南飛光透徹講堂東石壁下一泉曰錫杖又東南
五步一泉曰白鶴一見一否又東西二百步一泉曰甘露門西百步一泉曰黃龍皆爲絕景神宗章
聖嘗錫御書琅函鳳篆輝映巖谷皇上復降御篆飛白爲賜天文炳煥雲日相照寺之殿堂廊廡廚
庫僧房間總五百四十僧行童百有五十舉全數也每歲孟春迄首夏四嚮千里居民老幼削匭而
來散財施寶惟恐不及歲入數千緡齋粥之餘羨盈積多以至計司筦榷外臺督責寺僧紛擾應接

不暇大違清淨寂寞之本教慶曆皇祐間薦饑舊供者千百無一二至僧徒解散僅有存焉由是官禁亦弛雖財貨所殖非復曩時之盛而方袍員頂得以宴坐噫天其或者俾釋氏徒復其本歟東北崖上平處古堂殿基宛然石柱礎鐵像下體尙存蓋法定始置於此後爲來者遷之也今屋其上缺之辟穀者講習者居之以遠喧雜川中有一易之田十夫屋千楹歲租月僦以足經費唐相李吉甫纂十道圖以潤之棲霞台之國清荆之玉泉合茲寺爲四絕慶曆三年予爲長清尉寺居封內周覽絕景不知屬厭餘三則未之見也爾後十二年之官于亟道復過寺主事僧重淨以記見托暇日因具道山水奇偉經始肯構盛衰本末附勒于石或模之遠方俾未遊者見之一覽如目擊且使知靈跡巨麗信爲一絕又得以較雄勝於三者云

泰山錄

邵伯溫

客云昔罷兗曹與一二友祀岱岳因登絕頂四十里宿野人之廬前有藥龜地多鬼箭天麻元參之類將五鼓初各仗策而東僅一二里至太平頂叢木中有真宗東封壇遺址擁褐而坐以伺日出久之星斗漸稀東望如平地天際已明其下則暗又久之明處有山數峯如臥牛車蓋之狀星斗盡不

見其下尙暗初意日當自明處出又久之自大暗中日輪湧出正紅色騰起數十丈半至明處却半有光全至明處却全有光其下亦尙暗日漸高漸變色度五鼓三四點也經真廟帳宿之地石上方挂窠甚多又經龍口泉大石有罅如龍哆其口水自中出又經天門十八盤峯尤秀聳北眺齊諸山可指數信天下偉觀也

東遊記

元元好問

丙申三月二十有一日冠氏趙侯將會行臺公于泰安侯以予宿尙遊觀拉之偕行凡三十日往復千里而在鞍馬者八日故所歷不能從容然亦愈於未嘗至焉者因略計之以備遺忘郭巨廟在長清西南四十里所路旁小山之上齊武平中齊州胡僕射所造石室在焉所刻人物舟車馬象三壁皆滿衣冠之制絕與今世不同有如沈存中所記幙頭但不展脚耳西壁外胡僕射刻頌規制如磨崖狀字作隸書文齊梁體而苦不佳後題云居士慧朗侍從至朗能草隸書世謂朗公書者是也予意此頌必朗公所書故題字云然又有開元二十一年題字并長清尉李臯祭文隔馬祠在長清馬山之南距縣八九十里所大觀三年東平陳彥元廟記云盧城圯澗中得唐中和二年義昌節度押

衛國子祭酒兼御史大夫李公瞻作廟縣中時石刻載齊師爲晉所敗殺馬隘道晉師不得過謂以是得名字當爲格而今爲隔馬疑與左氏不合又謂里俗相傳景德中契丹寇兗鄆馬山之神陰障戎馬使不得南以是得名以予觀之古今祠廟不能考其所從來而妄爲立名號者多矣殺馬隘道神何預焉而祠之至於陰障戎馬則又齊東野人語也記又云知縣事晁端肅禱雨而應將以封爵請於朝今牘云豐施侯廟者豈端肅遂得所請耶靈巖寺亦長清東南百里所寺旁近有山曰雞鳴曰明孔寺後有方山泉曰雙鶴曰錫杖寺先有宋日御書今亡矣絕景亭在方山之下絕類嵩山法王党承旨世傑寺記云寺本希有如來出世道場後魏正光初梵僧法定撥土立之定之來青蛇導前雙虎負經景德中賜今名予按大觀中石橋記云寺是正光初重建然則党承旨亦未嘗徧考耶梁縣香山寺記說寺初建時一胡僧自西域來云此地山川甚似彼方香山今人遂謂梁縣香山真是大悲化現之所予意前所云希有道場者豈亦此類者抑党有所據而言也寺壁石刻甚多有張揆叔文蘇轍子由吳拭顧道詩餘人不能悉記太山舊說高四十三里今云四十五里又有言二十五里者出州北門經水簾馬棚迴馬嶺御帳護駕泉而上遂登天門岳頂四峯曰秦觀日觀越觀周

觀秦觀有封禪壇壇之下有秦李斯唐宋磨崖太史公謂太山雞一鳴日出三丈而予登日觀平明見日出疑是太史公夸辭問之州人云嘗有抱鷄宿山上者雞鳴而日始出蓋岱宗高出天半昏曉與平地異故山上平明而四十里之下纔昧爽間耳此語似亦有理故錄之岳祠在城中大定十九年被焚二十一年新廟成又三十年毀於真祐之兵今惟客省及誠享殿在耳此殿是貯御香及御署祝版之所城四周有岱岳青帝乾元升元四觀青帝觀有唐大中歲金龍石刻大聖祖無上大道金闕元元天皇帝大帝之號見於此岱岳觀有漢柏柯葉甚茂東有崑崙亭山水自溪礪而下就兩崖爲壁如香山石樓上以亭壓之北望天門屹然如立屏而獨流出几席之下真太山絕勝處也州門南道左有宋封祀壇合祀五方帝及九宮貴人壇壇南有碑碑陰載獻官姓名駙馬都尉二人攝司徒司空充黑帝青帝獻官九宮貴神合祀官右諫議大夫种放其名知名如魏庠輩過靈巖龍泉皆一宿而去得詩凡十首云

濟南行記

前人

予兒時從先隴城府君官掖縣嘗過濟南然但能憶其大城府而已長大來聞人談此州風物之美

遊觀之富每以不得一遊爲恨歲乙未秋七月予來河朔者三年矣始以故人李君輔之之故而得
一至焉因次第二十日間所遊歷爲行記一篇傳之好事者初至齊河約杜仲梁俱東並道諸山南
與太山接是日以陰晦不克見至濟南輔之與同官權國器置酒歷下亭故基此亭在府宅之後自
周齊以來有之旁近有亭曰環波鵲山北渚嵐漪水香水西曰凝波狎鷗臺與橋同曰百花芙蓉堂
曰靜化軒曰名士水西亭之下湖曰大明其源出於舜泉其大占城府三之一秋荷方盛紅綠如繡
令人渺然有吳兒洲渚之想大概承平時濟南樓觀天下莫與爲比喪亂二十年唯有荆榛瓦礫而
已正如南都隆德故宮頽圯百年澗谿草樹有荒寒古澹之趣雖高堂畫棟無復其舊而天巧具在
不待外飾而後奇也凡北渚亭所見西北孤峯五曰匡山齊河路出其下世傳李白嘗讀書於此曰
粟山曰藥山以陽起石得名曰鵲山山之民有云每歲七八月鳥鵲羣集其上亦有一山皆曰鵲時
此山之所以得名歟曰華不注太白詩云昔歲游歷下登華不注峯茲山何峻秀青翠似芙蓉此真
華峯寫照詩也大明湖由北水門出與濟水合瀾漫無際遙望此山如在水中蓋歷下城絕勝處也
華峯之東有臥牛山正東百五十里鄒平之南有長白山范文正公學舍在焉故又謂之黌堂嶺東

十里有南北兩妙山兩山之間有閔子驀墓西南大佛頭嶺下有寺千佛山之西有函山長二十里所山有九十谷太山之北麓也太山去城百里而近特爲函山所礙天晴登北渚則隱隱見之歷山去城四五里許山有碑云其山修廣出材不匱今但兀然一丘耳西南少斷有蠟山由南山而東則連互千里與海山通矣爆流泉在城之西南泉礫水源也山水匯於渴馬崖湫而不流近城出而爲此泉好事者曾以穀糠驗之信然往時漫流纔沒脛故泉上湧高三尺許今漫流爲草木所壅深及尋丈故泉出水面纔二三寸而已近世有太守改泉名檻泉又立檻泉坊取詩義而言然土人呼爆流如故爆流字又作趵突曾南豐云然金線泉有紋若金線夷猶池面泉今爲靈泉庵道士高生妙琴事人目爲琴高留予宿者再進士解飛卿好賢樂善款曲周密從予遊者凡十許日說少日曾見所謂金線者尙書安文國寶亦云以竹竿約水使不流尙或見之予與解裴回泉上者三四日然竟不見也杜康泉今湮沒土人能投其處泉在舜祠西廡下云杜康曾以此泉釀酒有取江中冷水與之較者中冷每升重二十四銖此泉減中冷一銖以之瀹茗不減陸羽所第諸水云舜井二有歐公詩大字石刻甘露園紀歷下泉云夫濟遠矣初出河東王屋曰沆水注秦澤潛行地中復出其山始

曰濟故禹書曰道沈水東之逾温逾墳城入於河益於滎汭於曹濮之間乃出於陶丘北會於汶過歷下灤水之北遂東流且濟之爲瀆與江淮河等大而均尊獨濟水所行道障於太行限於太河終能獨達於海不然則無以謂之瀆矣江淮河行地上水性之常者也濟或汭於地中水性之變者也予愛其論水之變與常有當於予心者故并錄之珍珠泉今爲張舍人園亭二十年前吾希顏兄嘗有詩至泉上則知詩爲工矣凡濟南名泉七十有二爆流爲上金線次之珍珠又次之若玉環金虎黑虎柳絮皇華無憂洗鉢及水晶簾非不佳然亦不能與三泉侔矣此游至爆流者六七宿靈泉庵者三汎大明湖者再遂東入水柵柵之水名繡江發源長白山下周圍三四十里府叅佐張子鈞張飛卿觴予繡江亭漾舟荷花中十餘里樂府皆京國之舊劇談豪飲抵暮乃罷留五日而還道出王舍人莊道旁一石刻云隋開皇丙午十二月鉛珍墓誌珍巴郡武昌人學通三家優遊田里以壽卒誌文鄙陋字以巴爲已蓋周隋以來俗書傳習之弊其云葬炮山之西者知西南小丘爲炮山也以歲計之隋開皇六年丙午至今甲午碑石出壙中蓋十周天餘一大衍數也道南有仁宗時侍從龍圖張侍郎揆讀書堂三字東坡所書并范純粹律詩俱有石刻揆字叔文自題仕宦之後每以王事

至某家則必會鄉鄰甥姪盡醉極歡而罷各以歲月爲識叔文有文譽仕亦達然以榮利之故終身至其家三而已名宦之役人如此可爲一嘆也至濟南又留二日汎大明待杜子不至明日行齊河道中小雨後太山峯嶺歷歷可數兩旁小山間見層出雲烟出沒顧揖不暇恨無佳句爲摹寫之耳前後所得詩凡十五首并諸公唱酬附於左

遊龍洞山記

張養浩

歷下多名山水龍洞爲尤勝洞距城東南三十里舊名禹登山按九域志禹治水至其上故云中有潭時出雲氣旱禱輒雨勝國嘗封其神爲靈惠公其前層峯雲矗曰錦屏曰獨秀曰三秀有僧居之繇錦屏抵佛刹山巉巖環合飛鳥劣及其半稍西卽山有龕屋深廣可容十數人周鑄佛像逃亂者多此依焉上下有二穴下者居旁可逶迤東出其曰龍洞卽此穴也望之窅然竊欲偕同來數人入觀卽遣僕然束菱前導初焉若高闊可步未幾俯首焉未幾磬折焉又未幾膝行焉又未幾則蒲伏焉又未幾則全體覆地蛇進焉會所導火滅煙鬱勃滿洞中欲退身不容引進則其前愈陋且重以煙燧械吻抑鼻潛息心駭亂恐甚自謂命當盡死此不復能出矣余強呼使疾進衆以煙故無有出

聲應者心尤恐然余適居前俄得微明意其穴竟於是極力奮身若魚縱焉者始獲脫然以出既出有泣者患者詬者相譏笑者頓足悔者提肩喘者喜幸加手其額者免冠科首具陳其狼狽狀者惟導者一人年稚瘠小先出若無所苦見衆皆病亦伴懾爲戲諸宴外者卽舉酒酌穴者人一二杯雖雅不酒必使之酌名曰定心飲余因憶昔韓文公登華山窮絕頂梗不能返號跳連日聞者爲白縣吏遂遣人下之嘗疑許事未必有以吾數人觀之則韓文公之號爲非妄矣於戲不登高不臨深前聖之訓較然而吾輩爲細娛使父母遺體幾同壓溺不弔其爲戒詎止辱身不可忘竊虞後來者或不知誤及此故紀其事以告焉

遊標山記

前人

綽然亭西三四里有雙山曰標各廣四十畝童無樹林東西並峙皆青石疊矗勢陂陁可步而上接輿圖經無其名蓋昔人以旁無他山惟此若標可望故以名之其上有洞如屋可避風雨始登若小勞旣戾其上神超氣逸身欲羽飛環視衆山半若可卽其聯巖屬巘盛於東南而微殺於西北諸支流之水縈絡交碧練橫繩引析而復合蓋郊外可登眺者莫此勝焉嘗欲構亭其上時杖履往來因